

# NÜXĨRAÛXŨ GA POPERA GA JUÁŨ ÜMATÜXŨ

## Ore i tüxũ maxẽxũchiga

**1** <sup>1</sup>Pexçax tanaxümatü nachiga ja Tupana Nane ja Cristu ja jima woetama marü nüxĩra jexmacü ga jexguma noxritama taüta naãne üxgu. Rü nüma rü Ore i Maxẽxẽruũ nixĩ i naéga erü nüma nixĩ i tamaã nüxũ jaxuxũ i Tupanachiga rü tüxũ namaxẽxẽxũ. Rü toma ga norü ngüexũgü na tixĩgũxũ, rü nüxũ taxĩnüe rü toxetümaã nüxũ tadaugü rü tomexmaã nüxũ tingögügü. <sup>2</sup>Rü jima Maxẽxẽruũ ja Cristu rü toxũ nügü nawex. Rü nüxũ tadaugü rü duũxũgümaã nüxũ tixu na nhuxãcü jĩxũ. Rü nhuxma rü pemaã rü ta nüxũ tixuchiga ja jima Cristu ja tüxna naxãcü i maxũ i taguma gũxũ. Rü noxri rü Nanatüxütawa najexma, notürü nhama ga naãnewa nangu rü toxçax nangox. <sup>3</sup>Rü jema toma nüxũ tadaugũxũ rü nüxũ taxĩnüexũ rü pemaã nüxũ tixu na tomücügü peixĩgũxũçax, ngẽxgumarüũ i toma na Tanatü ja Tupana rü Nane ja Ngechuchu ja Cristumücügü tixĩgũxũrüũ. <sup>4</sup>Rü ngẽmacax pexçax

tanaxümatü i nhaã ore na wüxigu aixcumaxũchi itaãẽgũxũçax.

## Nhama ngóonexũrüũ name ja Tupana

<sup>5</sup>Rü nhaã nixĩ ga ore ga tomaã nüxũ jaxuxũ ga Ngechuchu ja Cristu. Rü pemaã nüxũ tixu na nhama ngóonexũrüũ namexũ ja Tupana, rü nawa rü nataxuma i chixexũ i nhama ããnexũrüũ ixixũ, rü bai i íraxũ. <sup>6</sup>Rü ngẽxguma chi:

“Tanatü ja Tupanamücügü tixĩgü”, nhagügu, notürü chixri imaxëgu, rü tidoraemare erü tama aixcuma meã tamaxë. <sup>7</sup>Rü ngẽxguma chi Tupanarüũ ngóonexũwa imaxëgu, rü jigümücügü tixĩgü i jixema, rü Tupana Nane ja Ngechuchu rü nagümaã tüxũ inajanatauxẽẽ i guxũma i tórü chixexũ. <sup>8</sup>Ngẽxguma chi nüxũ ixuxgu rü:

“Changearü pecaduãx”, nhagügu, rü jigütama tawomüxẽẽ, rü tidoraemare. <sup>9</sup>Notürü ngẽxguma chi Tupanamaã nüxũ ixuxgu i tórü pecadugü, rü nüma tüxũ nüxũ nangechaũ rü tüxũ inajanatauxẽẽ i guxũma i tórü chixexũ,

erü nüma rü mecü nixĩ rü taguma tüxũ nawomüxêẽ. <sup>10</sup>Notürü ngëxguma chi:

“Tangearü pecaduãxgü”, nhagügu, rü dorataxax nüxũ tawogü ja Tupana rü tama aixcuma tawa nangëxma i norü ore.

**Cristu rü Tupanapexewa  
rü taétüwa nachogü**

**2** <sup>1</sup>Pa Chauxacügüx, pexçax chanaxümatü i nhaã ore na tama chixexũ pexügüxüçax. Notürü ngëxguma chi wüxie chixexũ üxgu, rü nangëxma ja tümaéttüwa chogücü nüxna ja Tanatü ja Tupana na tama tüxũ napocuxüçax. Rü jima nixĩ ja Ngechuchu ja Cristu ja aixcuma mecü ixĩcü. <sup>2</sup>Rü guma Ngechuchu ja Cristu rü nügü inaxã rü naju na naxütanüãxüçax ga tóru pecadugü. Rü tama tóru pecadugüxicatama naxütanü, notürü guxüma i duüxügüarü pecadugü ta naxütanü. <sup>3</sup>Rü ngëxguma chi naga ixĩnüëgu i ngëma tüxũ namuxũ ja Tupana, rü nüxũ tacuax na aixcuma nüxũ icuáxũ. <sup>4</sup>Rü ngëxguma chi wüxie:

“Chama rü Tupanaxü chacuax”, nhagügu, notürü tama naga taxĩnügu i ngëma tüxũ namuxũ ja Tupana, rü wüxi i dorataxáxũ tixĩ. <sup>5</sup>Notürü jixema naga ñnüxê i ngëma tüxũ namuxũ ja Tupana, rü aixcumaxüchi Tupanaxü tangechaũ. Rü ngëmawa nüxũ tacuaxgü na aixcuma Tupanaärü duüxügü ixĩgüxũ. <sup>6</sup>Rü jixema: “Tupanaärü duüxü chixĩ”, nhagüxe, rü name nixĩ na meã tamaxüxü jema Ngechuchu ja Cristu meã maxüxüriüü.

**Tupanaärü mu i  
ngexwacaxüxüchiga**

<sup>7</sup>Pa Chaueneëgüx, tama wüxi i ngexwacaxüxü i Tupanaärü mu nixĩ i

pexçax chaxümatüxũ. Notürü nhaãtama noxriarü ügügumama pexü jexmaxü ga mu nixĩ. Rü nhaãtama nixĩ i Tupanaärü mu ga nuxcümaüxü ga marü nüxũ pexĩnüëxü. <sup>8</sup>Notürü nhaã Tupanaärü mu i pexçax chaxümatüxü rü guxüguma nangexwacaxü. Rü ngëxguma naga pexĩnüëgu i nhaã Tupanaärü mu na pegü pengechaügüxü, rü tama êãnexüwatama pemaxê, notürü Cristurüü ngëma ngóonexü i aixcuma ixĩüwa pengëxmagü. <sup>9</sup>Rü ngëxguma chi wüxie:

“Chama rü ngëma ngóonexüwa changëxma”, nhagügu, notürü tümaëneëchi taxaixgu, rü êãnexüwatama tangëxma. <sup>10</sup>Jixema tümaëneëxü ngechaüxê rü ngóonexüwa tamaxü, rü taxuüçaxma tüxücüü pecadu taxü. <sup>11</sup>Notürü jixema tümaëneëchi aixe, rü êãnexüwatama tamaxü, rü êãnexügu tixü. Rü tama nüxũ tacuax na ngextá taxüxü, erü tümacax naxêãne.

<sup>12</sup>Pa Chauxacügüx, pexçax chanaxümatü erü Cristugagu Tupana marü pexü nüxũ nangechaü i perü pecadugü. <sup>13</sup>Pa Papagüx, pexçax chanaxümatü i nhaã ore erü nüxũ pecuaxgü ja Tanatü ja Tupana ga noxriarü ügügumama jexmacü. Pa Ngextüxüçügüx, pexçax chanaxümatü erü marü nüxũ perüjexera i ngëma ngoxo i Chataná i chixexüärü üruü. <sup>14</sup>Pa Buxügüx, pexçax chanaxümatü erü marü nüxũ pecuaxgü ja Tanatü ja Tupana. Pa Papagüx, pexçax chanaxümatü erü marü nüxũ pecuaxgü ja Tanatü ja Tupana ga noxriarü ügügumama jexmacü. Pa Ngextüxüçügüx, pexçax chanaxümatü

erü peporae, rü guxũguma peẽewa nangẽxma i Tupanaãrũ ore, rü marũ nüxũ perũjexera i ngẽma ngoxo i Chataná i chixexũãrũ ũruũ. <sup>15</sup>;Tãú i pexũ nangũchaũxũ i nhama i naãne rü norũ ngẽmaxũgũ! Ngẽxguma chi texéaxũ nangũchaũgu i nhama i naãne rü tama Tanatũ ja Tupanaxũ tangechaũ. <sup>16</sup>Erũ guxũma i ngũchaũgũ i nhama i naãnewa ngẽmaxũ rü nhama i naãneãrutama nixĩ rü tama Tupanaãrũ nixĩ. Rü ngẽma ngũchaũgũ rü ngẽma nixĩ i taxũneãrũ ngũchaũgũ, rü taxetũarũ ngũchaũgũ, rü jigũ na icuaxũũgũxũ tórũ ngẽmaxũgũmaã. <sup>17</sup>Notürũ nhama i naãne rü guxũma i ngũchaũgũ i nawa ngẽmaxũ rü tá nagux. Notürũ jĩxema Tupanaga ìnũxẽ rü guxũgutãma tamaxũ.

**Ore i aixcuma ixĩũchiga rü ore i dora ixĩũchiga**

<sup>18</sup>Pa Chauxacũgũx, paxa tá nagux i nhama i naãne. Pema rü marũ nüxũ pexĩnũchiga rü tá ìnangu i wũxi i Cristuarũ uwanũ, notürũ marũ ìnangugũ i muxũma. Rü ngẽmawa nüxũ tacuax na marũ nagũxchaũxũ i nhama i naãne. <sup>19</sup>Rü ngẽma Cristuarũ uwanũgũ rü tatanũwatama nangẽxmagũchirex, notürũ tama aixcuma tatanũxũ nixĩgũ, erũ ngẽxguma chi tatanũxũ jixĩgũgu rü tatanũgu chitama narũcho. Notürũ marũ tatanũwa ìnachoxũ na meãma nüxũ icuaxũçax na tama aixcuma tatanũxũ jixĩgũxũ. <sup>20</sup>Notürũ pema rü Cristu marũ pexna nanamu i Naãẽ i Üünexũ, rü ngẽmacax meãma nüxũ pecuax i Tupanaãrũ ore. <sup>21</sup>Rü nhuxma rü tama nixĩ na tama nüxũ pecuaxũçax

na pexçax chaxũmatũxũ. Notürũ pexçax chanaxũmatũ erũ marũ meãma nüxũ pecuax i ngẽma ore i aixcuma ixĩxũ. Rü nüxũ pecuax rü ngẽma ore i aixcuma ixĩxũwa rü nataxuma i dora. <sup>22</sup>;Texé tiĩxũ ja jĩxema idorataxãxe? Jĩxema:

“Ngechuchu rü tama aixcuma Cristu ja Tupana Nane nixĩ”, nhagũxe, tixĩ ja idorataxãxe. Jĩxema tixĩ ja Cristuarũ uwanũ, erũ tama nüxũ tacuaxçhaũ ja Tanatũ ja Tupana rü Nane ja Ngechuchu. <sup>23</sup>Guxãma ja jĩxema tama nüxũ cuaxçhaũxẽ ja Tupana Nane ja Ngechuchu, rü tama nüxũ tacuaxçhaũ ta ja Tanatũ ja Tupana. Notürũ jĩxema Ngechuchuaxũ jaxõxẽ, rü Tanatũ ja Tupanaãxũ rü ta tajaxõ. <sup>24</sup>Rü ngẽmacax name nixĩ i pejaxõgũama i ngẽma ore ga noxri nüxũ pexĩnũxũ. Rü ngẽxguma pejaxõgũamagu i ngẽma ore ga noxri nüxũ pexĩnũxũ, rü aixcuma norũ duũxũgũ peixĩgũ ja Tupana Nane ja Ngechuchu rü Tanatũ ja Tupana. <sup>25</sup>Rü nümatama ja Ngechuchu ja Cristu nixĩ i tamaã inaxunetaxũ na tũxna naxããxũçax i maxũ i taguma gũxũ. <sup>26</sup>Nangẽxma i duũxũgũ i chixexũwa pexũ gagũchaũxũ. Rü ngẽmachiga nixĩ i pexçax chanaxũmatũxũ i nhaã ore. <sup>27</sup>Notürũ pema rü marũ Cristu pexna nanamu i Naãẽ i Üünexũ, rü guxũguma pewa nangẽxma. Rü ngẽmacax tama penaxwaxe i to i perũ ngũxexẽxũ erũ nümatama i Naãẽ i Üünexũ rü pexũ nangũxexẽ i guxũma. Rü norũ ngũxexẽtae rü aixcuma nixĩ rü tama dora nixĩ. Rü ngẽmacax name nixĩ na guxũguma Cristuaxũ pejaxõgũxũ, ngẽma Naãẽ i Üünexũ pexũ ngũxexẽxũãcũma. <sup>28</sup>Rü nhuxmax, Pa

Chauxacügüx, rü name nixĩ na meãma Cristuaxũ pejaxögüxũ na tama nüxũ imuũëxũcax, rü tama ixãneëxũcax napexewa i ngëxguma wena nuã naxüxgu. <sup>29</sup>Pema nüxũ pecuax na Cristu rü aixcuma mecü jïixũ. Rü ngëxgumarüũ ta name nixĩ na nüxũ pecuaxũ na guxũma i duũxügü i mexũ ügüxũ rü Tupanaxãcügü na jixĩgüxũ.

### Tupanaxãcügüchiga

**3** <sup>1</sup>¡Dücax, Pa Chaueneëgüx, nhuxãcü poraãcü tüxũ nangechaũ ja Tanatü ja Tupana! Rü ngëmacax nixĩ i naxãcügümaã tüxũ naxuxũ i nümax. Rü aixcuma naxãcügü tixĩgü. Rü ngëmacax nhama i naãneçüãx i duũxügü rü tama tüxũ nacuáxchaũ erü Tupanaxũ rü ta tama nacuáxchaũgü. <sup>2</sup>Pa Chaueneëgü ja Pexũ Changechaũgüxe, nhuxma rü marü Tupanaxãcügü tixĩgü woo tama tüxũ nüxũ nacuaxëe na nhuxãcü tá ixĩgüxũ i jixcúra. Notürü nüxũ tacuaxgü na Ngechuchurüũ tá ixĩgüxũ i ngëxguma nangoxgu, erü tá nüxũ tadaugü na nhuxãcü jïixũ i nümax. <sup>3</sup>Rü guxãma ja jixema jaxóxe na Ngechuchurüũ tá tiixũ, rü tügüna tadau na Ngechuchu ja Cristurüũ aixcuma Tupanapexewa tamexũ. <sup>4</sup>Notürü guxãma ja jixema pecadu üxe, rü Tupanamaã chixexũ taxü. Erü ngëxguma tama Tupanaga taxĩnügü, rü tapecaduãx. <sup>5</sup>Pema nüxũ pecuax rü Ngechuchu ja Cristu rü nhama ga naãnewa naxü na ijanaxoxëëãxũcax i tóru pecadugü. Rü nüma rü taguma pecadu naxü. <sup>6</sup>Rü ngëmacax guxãma ja jixema aixcuma nüxũ jaxögüxe, rü tama pecadu taxügüecha. Notürü guxãma ja jixema

pecadu üechaxe, rü ngëmaãcü tamaxë erü taguma Cristuxũ tadau, rü taguma nüxũ tacuax. <sup>7</sup>Pa Chauxacügüx, ¡tãú i naga pexĩnüëxũ i ngëma duũxügü i pexũ ijarütauxexëëchaũxũ! Jixema mexũ üxe rü aixcuma mecü tixĩ, ngëxgumarüũ ja Cristu na aixcuma mecü jïixũrüũ.

<sup>8</sup>Notürü jixema pecadu üechaxe rü ngëmawa tüxũ tacuax na Chatanáãrü duũxũ tiixũ, erü nüma i Chataná rü noxriarü ügügumama pecadu naxüecha. Rü jemacax ga Tupana Nane rü nhama ga naãnewa naxü na ijanaxoxëëãxũcax ga jema Chataná üxũ. <sup>9</sup>Rü jixema Tupanaxãcü ixixë rü tama pecadu taxüecha, erü naxãcüxüchi tixĩ. Rü taxuacüma pecadu taxüecha erü Tupana nixĩ ja tümanatü. <sup>10</sup>Jixema chixexũ üxe rü tümaëneëchi aixe, rü tama Tupanaxãcü tixĩ. Rü ngëmawa nüxũ tacuax na texë tixĩgüxũ ja Tupanaxãcügü rü texë tixĩgüxũ ja Chatanáãcügü.

### Name nixĩ na jigü ingechaũgüxũ

<sup>11</sup>Name nixĩ na jigü ingechaũgüxũ i wüxichigü. Rü jematama ore nixĩ ga noxriarü ügügumama nüxũ pexĩnüëxũ. <sup>12</sup>Rü tama tanaxwaxe na Caírüũ ngoxo i Chatanáãcü ixĩgüxũ. Jerü nüma rü naëneëxũ nimax. ¿Rü tacücax nixĩ ga jamáãxũ? Najamax jerü jema nüma naxüxũ rü tama name, rü jema naëneë üxũ rü name. <sup>13</sup>Pa Chaueneëgüx, ¡tãú i pebaixãchiãëgüxũ ega pechi naxaiegu i nhama i naãneçüãx i duũxügü! <sup>14</sup>Jixema rü marü nüxna ítanguxũ i ngëma ju rü nhuxma rü marü maxüwaama tangëxmagü. Nüxũ tacuaxgü i ngëma erü nüxũ

tangechaũgü i taeneẽgü. Jíxema tama tũmaẽneẽxũ ngechaũxẽ rü juwatama tangẽxma. <sup>15</sup>Rü Jíxema tũmaẽneẽchi aixẽ rü wüxi i máẽtaxũrũ tixĩ. Rü pema nüxũ pecuaxgü i wüxi i máẽtaxũ rü nüxũ nataxuma i norü maxũ i taguma gũxũ. <sup>16</sup>Rü Ngechuchu ja Cristu rü tórü pecaduçax naju, rü jemaãcü tüxũ nüxũ nadauxẽẽ i ngẽma ngechaũ i aixcuma ixĩxũ. Rü ngẽxgumarũ ta i jixema, rü tanaxwaxe na fímemarexũ na nüxũ rüngũxẽẽxũ i taeneẽgü woo nagagu ijuxgu. <sup>17</sup>Notürü ngẽxguma chi wüxi i jatũãxũ nangẽxmagu i muxũma i norü ngẽmaxũgü, rü chi nüxũ nadaxgu i namücü na nüxũ nataxuxũ, rü taxuacüma:

“Chama rü Tupanaxũ changechaũ”, nhanagürü, ega tama nüxũ nangũxẽẽgu i namücü. <sup>18</sup>Pa Chauxacügüx, tama name i taçxmaã rü tórü oremaãxícatama nüxũ tangechaũ i taeneẽ. Notürü tanaxwaxe i tórü maxũmaã rü tórü ü i mexũmaã nüxũ tangechaũ.

#### **Tama taxãneẽ na Tupanana ingaicamagũxũ**

<sup>19-20</sup>Rü ngẽxguma aixcuma jigü ingechaũgügu, rü nüxũ tacuax na aixcuma naga ixĩnũxũ i ngẽma ore i aixcuma ixĩxũ, rü Tupanapexewa rü aixcuma naxãcügü ixĩgũxũ, woo ngẽxguma taãẽwa nagu rüxĩnügu rü:

“Tama Tupanaxãcü chixĩ”, nhagügu. Erü nüxũ tacuax rü Tupana nixĩ i taãẽãrũ jexera, rü nüma nüxũ nacuax i guxũma. <sup>21</sup>Pa Chaueneẽgü ja Pexũ Changechaũgüxex, ngẽxguma taãẽwa nüxũ icuaxgu na Tupanaxãcüxũchi

ixĩgũxũ, rü tama taxãneẽ na nüxna ingaicamagũxũ ja Tanatü ja Tupana. <sup>22</sup>Rü nüma tá tüxna nanaxã i guxũma i çacü i naxçax fiçaxũ erü naga taxĩnũẽ i ngẽma tüxũ namuxũ rü tanaxü i ngẽma nüma namaã nataãẽxũ. <sup>23</sup>Rü nüma tüxũ namu na Nane ja Ngechuchu ja Cristuaxũ jaxõgũxũ rü jigü ingechaũgũxũ, jema nüma tüxũ namuxũãcü. <sup>24</sup>Rü Jíxema naga ãnũẽxẽ i ngẽma Tupana tüxũ muxũ, rü aixcuma Tupanaãrũ duũxũgü tixĩgü rü nüma ja Tupana rü aixcuma tũmawa namaxũ. Rü nhuxma rü nüxũ tacuax na aixcuma Tupanaãrũ duũxũgü ixĩgũxũ rü tawa namaxũxũ, erü Naãẽ i Üünexũ ga tüxna namuxũ tüxũ nüxũ nacuaxẽẽ.

**Jíxema tüxũ nangẽxmaxẽ i Tupanaãẽ i Üünexũ rü jíxema tüxũ nangẽxmaxẽ i Cristuarü uwanüãẽ**

**4** <sup>1</sup>Pa Chaueneẽgü ja Pexũ Changechaũgüxex, ¡Táü i nüxũ pejaxõgũxũ i guxũma i orearü uruũgü i nügü ixugũgũxũ na aixcuma Tupanaãrũ orearü uruũgü jixĩgũxũ! Notürü name nixĩ i penangugü i norü ore na nüxũ pecuaxũçax ngoxita aixcuma Tupanaãẽ jĩxũ i nawa idexaxũ rü exna tama. Erü nhama i naãnewa rü guxũwama nangẽxma i muxũma i idorataaxgũxũ i nügü ixugũxũ na Tupanaãrũ orearü uruũgü jixĩgũxũ. <sup>2</sup>Rü tá pemaã nüxũ chixu na nhuxãcü tá nüxũ pecuaxũ na texé tiixũ ja jíxema aixcuma Tupanaãẽ tũmawa ngẽxmaxẽ. Rü dücax, guxũma i orearü uruũgü i nüxũ ixugũxũ na Tupana duũxũxũ jaxĩxẽẽxũ ja Ngechuchu ja Cristu, rü ngẽma nixĩ i aixcuma Tupanaãẽ nawa idexaxũ.

<sup>3</sup>Notürü guxũma i ngẽma orearü uruũgü i tama nüxũ ixügüxũ na Tupana duũxũxũ jaxĩxẽxũ ga Ngechuchu, rü ngẽma rü tama nüxũ nangẽxma i Tupanaãe i Üünexũ. Notürü Cristuarü uwanüãe nixĩ i nawa ngẽxmaxũ. Marü nüxũ pexĩnũe na ínguxchaũxũ i Cristuarü uwanü, notürü nhuxma rü marü nhama i naãnewa nangẽxma. <sup>4</sup>Pa Chaucaçügüx, pema rü Tupanaxãcügü peixĩgü. Rü marü nüxũ perüjexera i ngẽma tama aixcuma Tupanaãrü orearü uruũgü ixĩgüxũ. Erü ngẽma Tupanaãe i Üünexũ i peãewa ngẽxmaxũ rü nüxũ narüjexera i ngẽma Cristuarü uwanüãe i nhama i naãneçũãxgüwa ngẽxmaxũ. <sup>5</sup>Rü nüma i Cristuarü uwanüãrü duũxũgü rü nhama i naãneçũãxgü nixĩ. Rü ngẽmaçax nhama i naãnechigagu nidexagü. Rü nhama i naãneçũãx i duũxũgü rü nüxũ inarüxĩnũe. <sup>6</sup>Notürü i jixema rü Tupanaxãcügü tixĩgü. Rü jixema Tupanaxũ cuãxe rü tüxũ itarüxĩnũ. Notürü jixema tama Tupanaxũ cuãxe rü tama tüxũ itarüxĩnũ. Rü ngẽmawa nüxũ tacuãxgü na texé tixĩgüxũ ja aixcuma Tupanaãrü duũxũgü ixĩgüxe rü texé tixĩgüxũ ja Cristuarü uwanüãrü duũxũgü ixĩgüxe.

### Tupana tüxũ nangechaũ

<sup>7</sup>Pa Chaueneëgü ja Pexũ Changechaũgüxex, name nixĩ na jigü ingechaũgüxũ, erü Tupana nixĩ ja tüxũ ngüexẽecü na jigü ingechaũgüxũ. Rü guxãma ja jixema tümaẽneëxũ ngechaũxẽ rü Tupanaxãcü tixĩgü rü Tupanaxũ tacuãx. <sup>8</sup>Jixema tama tümaẽneëxũ ngechaũxẽ rü tama Tupanaxũ tacuãx, erü Tupana nixĩ ja

tüxũ ngüexẽecü na jigü ingechaũgüxũ. <sup>9</sup>Tupana rü nhama ga naãnewa nanamu ga Nane ja nügümaã wüxicacü na jimagagu tüxũ nangẽxmaxũçax i maxũ i taguma gúxũ. Rü jemawa Tupana tüxũ nüxũ nadauxẽe na nhuxãcü tüxũ nangechaũxũ. <sup>10</sup>Rü woo Tupanaxũ tangechaũgü, notürü ngẽma ngechaũ i guxũãrü jexera ixĩxũ nixĩ na nüma tüxũ nangechaũxũ rü nhama ga naãnewa na namuãxũ ga Nane na taxçax najuxũçax rü naxütanüãxũçax ga tórü pecadugü. <sup>11</sup>Pa Chaueneëgü ja Pexũ Changechaũgüxex, jexguma jemaãcü tüxũ nangechaũgu ga Tupana, rü ngẽmacax name nixĩ i jixema rü ta jigü tangechaũgü. <sup>12</sup>Taguma texé Tupanaxũ tadau. Notürü ngẽxguma aixcuma jigü ingechaũgügu, rü Tupana rü tawa namaxũ rü norü ngechaũ rü aixcumaxũchi tórü maxũwa nangox. <sup>13</sup>Rü nüma rü marü tüxna nanamu ga Naãe i Üünexũ. Rü ngẽmawa nüxũ tacuãx na aixcuma norü duũxũgü ixĩgüxũ rü nüma rü tawa na namaxũxũ. <sup>14</sup>Rü tomatama nüxũ tadaugü rü nüxũ tixuchigagü na Tanatü ja Tupana nüma namuxũ ga Nane na guxũma i duũxũgüxũ namaxẽẽxũçax. <sup>15</sup>Rü jixema jaxóxẽ rü nüxũ ixuchigaxe na Tupana Nane jiĩxũ ja Ngechuchu, rü aixcuma Tupanaãrü duũxũ tixĩ, rü Tupana rü tümawa namaxũ. <sup>16</sup>Rü jixema nüxũ tacuãxgü rü tajaxögü na Tupana rü poraãcü tüxũ nangechaũxũ, erü nüma nixĩ i aixcuma guxãxũ nangechaũxũ. Rü jixema aixcuma tümaẽneëxũ ngechaũxẽ, rü Tupanaãrü duũxũ tixĩ, rü nüma ja Tupana rü aixcuma tümawa namaxũ. <sup>17</sup>Rü

ngêxguma aixcuma Tupanaxũ ingechaũgũgu, rü tóru maxũwa nangox i ngêma, rü tãuxũtãma nũxũ tamuũê i ngêma ngunexũ i nagu tũxũ jacagũxũgu naxçax i tóru maxũ. Erü woo nhama i naãnewa tangêxmagũ, notürü napexewa rü Cristurũ tixĩgũ. <sup>18</sup>Rü ngêxguma aixcuma Tupanaxũ ingechaũgũgu, rü nũxũ tacuax na tãuxũtãma tũxũ napocuxũ, rü ngêmacax taxuũçaxma nũxũ tamuũê. Notürü ngêxguma chi nũxũ imuũêgu, rü nũxũ tacuax na tama aixcuma nũxũ ingechaũgũxũ. <sup>19</sup>Rü jixema rü Tupanaxũ tangechaũgũ, jerü nũxĩra tũxũ nangechaũ ga nümax.

<sup>20</sup>Ngêxguma chi texé:

“Chama rü Tupanaxũ changechaũ”, nhagũgu, notürü tũmaêneêchi taxaixgu, rü tidora. Erü ngêxguma tama nũxũ tangechaũgu i tũmaêneê i nũxũ tadauxũ rü taxuacũma nũxũ tangechaũ ja Tupana ja tama nũxũ tadaucũ. <sup>21</sup>Rü Ngechuchu ja Cristu tũxũ namu rü nhanagürü:

“Jíxema Tupanaxũ ngechaũxê, rü name nixĩ na tũmaêneêxũ rü ta tangechaũxũ”, nhanagürü.

**Nũxũ tarüjexera i nhama i naãneärü ngúchaũgũ**

**5** <sup>1</sup>Ngechuchu rü Tupana Nane ja Cristu nixĩ. Rü guxãma ja jíxema nũxũ jaxóxê, rü Tupanaxãcũ tixĩgũ. Rü jíxema Tanatũ ja Tupanaxũ ngechaũxê, rü nũxũ tangechaũ ta i guxũma i naxãcũgũ. <sup>2</sup>Rü ngêxguma Tupanaxũ ingechaũgũgu rü naxũxgu i ngêma nüma tũxũ namuxũ, rü nũxũ tacuax na aixcuma nũxũ ingechaũgũxũ i ngêma

naxãcũgũ ixĩgũxũ. <sup>3</sup>Rü ngêxguma aixcuma Tupanaxũ ingechaũgũgu rü naga taxĩnũê i ngêma tũxũ namuxũ. Rü ngêma tũxũ namuxũ rü tama naguxcha na naga ixĩnũêxũ. <sup>4</sup>Erü guxãma ja aixcuma Tupanaxãcũ ixĩxê, rü tama nhama i naãneärü ngúchaũ i chixexũgu tarũxĩnũ. Rü jixema rü tajaxógũ, rü ngêmacax tama name i nhama i naãneärü ngúchaũ i chixexũgu tarũxĩnũê. <sup>5</sup>Rü jíxema jaxóxê na Tupana Nane jíxũ ja Ngechuchu, rü jíxema tixĩ ja tama nhama i naãneärü ngúchaũ i chixexũgu rüxĩnũxê.

**Ore i Tupana Nanechiga**

<sup>6</sup>Rü nũxũ tacuax na aixcuma Tupana Nane jíxũ ja Ngechuchu. Jerü jexguma nhama ga naãnewa najexmagu rü dexãwa ínabaiegu, rü nümatama ga Tupana nũxũ nixu na Nanexũchi jíxũ. Rü jexguma curuchagu najuxgu rü nagü inabaãgu ga Ngechuchu, rü Tupana rü wenaxãrũ inanawex na aixcuma Nane na jíxũ. Rü ngêxgumarũ ta i ngêma Naãê i Üünexũ i taguma idoraxũ, rü tũxũ nũxũ nacuaxêê na aixcumarũchi Tupana Nane na jíxũ. <sup>7</sup>Rü ngêmaãcũ tũxũ nangêxma i tamaêxpũx i cuaxruũgũ i tũxũ nũxũ cuaxêêxũ na aixcuma Tupana Nane jíxũ ja Ngechuchu. <sup>8</sup>Rü ngêma norü wũxi nixĩ i Naãê i Üünexũ, rü ngêma norü taxre nixĩ ga jema Tupanaga ga jexguma Ngechuchu dexãwa íbaiegu, rü ngêma norü tomaêxpũx nixĩ ga jema Tupana üxũ ga jexguma curuchagu nagü inabaãgu ga Ngechuchu. Rü guxũma i ngêma tamaêxpũx, rü wũxigu nũxũ nixu na aixcuma Tupana Nane jíxũ ja

Ngechuchu. <sup>9</sup>Nüxú tájaxõgü i duũxũgü ega tacüxũ tamaã jaxugügu. Notürü Tupanaãrü ore nixĩ i jexeraãcü aixcumaxũchi ixixũ. Rü Tupana nixĩ ja tamaã nüxũ ixucü na Ngechuchu rü Nane jiixũ. <sup>10</sup>Rü jixema nüxú jaxóxê ja Tupana Nane rü nüxũ tacuax na aixcuma jiixũ i ngêma ore i Tupana nüxũ ixuxũ i Nanechiga. Notürü jixema tama Tupanaãxú jaxóxê rü dorataax nüxũ tawogü ja Tupana erü tama tajaxõ i ngêma ore i Tupana nüxũ ixuxũ i Nanechiga. <sup>11</sup>Rü nhaã nixĩ i norü ore ja Tupana i tamaã nüxũ jaxuxũ, rü:

“Chamatama marü pexna chanaxã i maxũ i taguma gúxũ. Rü nhaã maxũ rü Chaunegagu pexũ nangêxma”,

nhanagürü. <sup>12</sup>Jixema nüxú jaxóxê ja Tupana Nane rü tüxú nangêxma i ngêma maxũ i taguma gúxũ. Notürü jixema tama nüxú jaxóxê ja jima Nane rü tama tüxú nangêxma i ngêma maxũ.

**Juáũ rü nhuxre ga norü ucuxêmaã  
inajacuaxêê ga norü popera**

<sup>13</sup>Pa Chaueneëgüx ja Tupana Naneãxú Jaxõgüxex, pexçax chanaxumatü i nhaã ore na nüxũ pecuáxüçax na pexũ nangêxmaxũ i ngêma maxũ i taguma gúxũ. <sup>14</sup>Rü ngêmacax tama taxãneê na nüxna ingaicamagüxũ ja Tupana. Rü nüxũ tacuaxgü ega tacüçax nüxna icaxgu, rü nüma tüxũ naxĩnü i ngêxguma norü ngúchaũ jixĩgu i ngêma naxçax nüxna icaxũ. <sup>15</sup>Rü ngêxguma nüxũ icuaxgu na nüma tüxũ naxĩnüxũ i ngêxguma tacüçax nüxna icaxgu, rü nüxũ tacuax ta na tüxna naxããxũ i

ngêma naxçax nüxna icaxũ. <sup>16</sup>Rü ngêxguma chi texé nüxũ daxgu i tümaëneê na pecadu naxüxũ, rü name nixĩ na naxçax tajumüxéxũ ega tama pecadu i ijanatauxêêxũ jixĩgu. Rü Tupana tá nanamaxêê i ngêma tümaëneê ega tama pecadu i ijanatauxêêxũ jixĩgu. Nangêxma i pecadu i tüxũ ijarütauxêêxũ. Rü ngêxguma ngêma pecaduwe naxüãmagu i wüxi i peeneê, rü tama pemaã nüxũ chixu na naxçax pejumuxêgüxũ. <sup>17</sup>Guxũma i chixexũ i ixixũ, rü pecadu nixĩ. Notürü nangêxma i pecadu i tama tüxũ ijarütauxêêxũ. <sup>18</sup>Rü nüxũ tacuax, rü jixema Tupanaxãcü ixixê, rü tama pecadu taxüecha, erü nüma ja Tupana Nane rü tüxna nadau. Rü taxuacüma tüxna nangaicama i ngoxo i Chataná i tüxũ pecaduãxêêchaũxũ. <sup>19</sup>Nüxũ tacuaxgü na Tupanaxãcügu ixigüxũ, notürü guxũma i nhama i naãneçüãx rü ngoxo i Chatanámxêwa nangêxmagü. <sup>20</sup>Rü nüxũ tacuax ta na nhama ga naãnewa nanguxũ ga Tupana Nane, rü tüxna nanaxã ga cuax na nüxũ icuaxgüxüçax ja jima aixcumaxũchi Tupana ixĩcü. Rü norü duũxũgü tixĩgü ja jima aixcumaxũchi Tupana ixĩcü, erü Nane ja Ngechuchu ja Cristuarü duũxũgü tixĩgü. Rü nüma ja Tupana Nane nixĩ i aixcumaxũchi Tupana jiixũ rü tüxna naxããxũ i maxũ i taguma gúxũ. <sup>21</sup>Pa Chauxacügüx, ¡Pegüna pedaugü na tama nüxú pejaxõgüxüçax i tupanachicügü! Rü ngêxcatama nixĩ i chorü ore i pemaã nüxũ chixuxũ.

*Rü nuãma pexna,  
Juáũ*